

# Uorden da sepultura e santeri dalla vischnaunca da Laax

Sebasond sin art. 12 alinea 2 dalla lescha davart ils fatgs da sanadad dil cantun Grischun dils 2 da december 1984 e sin l'ordinaziun cantunala dils 27 d'october 1998 partenent ils fatgs da sepultura

approbau dalla radunonza communal da Laax dils 16 da december 2005.

## I. Organisaziun, menaschi e survigilanza

### Art. 1

La survigilanza digl uorden da sepultura e santeri ei incumbensa dalla suprastonza communal. Ella ei responsabla per l'execuziun digl uorden da sepultura e santeri.

Survigilanza ed  
execuziun

### Art. 2

La suprastonza communal ha cunzun ils suandonts duers:

- a) ella relai las ordinaziuns per il diever e manteniment dil santeri;
- b) ella survigilescha las fossas, las cruschs-fossa ed ils monuments da fossa;
- c) ella lubescha da rumir la fossa suenter ch'il temps da ruaus ei spiraus;
- d) ella dat lubientschas excepziunalas per la sepultura da nundomiciliai;
- e) ella numna e survigilescha il personal necessari pil santeri.

Duers

## II. Uorden da sepultura

### Art. 3

In defunct astga vegnir mess el vischi pér suenter ch'in miedi cun pratica en Svizra ha constatau la mort ufficialmein.

Metter el vischi

Partenent metter el vischi baras contagiusas ein las prescripziuns federalas decisivas.

### Art. 4

Il transport da baras ei causa dalla parentella. Las prescripziuns specialas da confederaziun e cantun restan resalvadas. (Sclariment dat l'administraziun communal).

Transport da  
baras

### Art. 5

Tuttas burgheisas e tuts burgheis da Laax, tuts domiciliai a Laax, tut quels ch'eiin morts e dils quals la bara ei vegnida anflada silsuenter sin territori dalla vischnaunca da Laax, vegnan satrai sil santeri public.

Dretg da  
sepultura

A negin astga vegnir snegau ina undreivla sepultura sil santeri public pervia d'opiniuns differentas da cardientscha ni pervia d'auters motivs.

Sin giavisch dil defunct ni da sia parentella e cun lubientscha dalla supra-stonza communal cumpetenta da leu sa la sepultura haver liug en gliez santeri.

#### **Art. 6**

Persunas senza domicil a Laax ch'ein buca mortas ni vegnidas anfladas mortas en vischnaunca astgan vegnir satradas a Laax mo cun ina lubientscha speciala dalla suprastonza communal.

Lubientscha da sepultura

#### **Art. 7**

Per tut ils defuncts stat il carner a disposiziun.

Metter en bara

Il temps maximal da metter en bara munta 3 dis. Urnas astgan star silpli 10 dis en carner.

#### **Art. 8**

La canzlia communal ordeina la preparaziun dalla fossa e pren las disposiziuns necessarias en cass specials, sco per exempel tier baras anfladas senza vegnentsuenter.

Preparaziun da sepultura

#### **Art. 9**

Las taxas per la sepultura serefereschon agl uorden da taxas da sepultura e santeri, relaschaus dalla radunonza communal.

Taxas da sepultura

#### **Art. 10**

Per annunziar la mort vegn ei tuccau treis gadas cuortamein cul zenn grond. 90 minutas avon la sepultura vegn tuccau duront 30 minutas ils cuors cun tut ils zenns.

Tuchiez da bara

#### **Art. 11**

Il santeri entuorn la baselgia da sogn Otmar e sogn Gagl ei proprietad dalla pleiv da Laax. Alla vischnaunca politica da Laax vegn ei concediu il dretg permanent d'utilisaziun.

Proprietad

### **III. Uorden da santeri**

#### **Art. 12**

La canzlia communal fa in plan co occupar il santeri.

Plan da santeri

### Art. 13

La repartiziun dallas fossas en retscha sedrezza tenor in plan da santeri fatgs dalla suprastanza communal.

Repartiziun dallas fossas

Ei vegn satrau tenor in plan en retscha successiva.

Las fossas ein repartidas en:

- a) per sepulturas en vischi
  - fossas per carschi e giuvenils sur 7 onns
  - fossas per affons sut 7 onns
- b) per sepulturas en urna
  - fossas per urnas
  - fossa existenta cun vischi

### Art. 14

La distanza denter las singulas fossas mesira sil pli pauc 30 cm.

Grondezia dallas fossas

Las ramas dallas fossas ston esser uniformas e corrispunder allas suandontas mesiras.

- a) per fossas da carschi e giuvenils sur 7 onns
  - liung 150 cm
  - lad 60 cm
  - profund 150 cm
- b) per affons sut 7 onns
  - liung 95 cm
  - lad 45 cm
  - profund 120 cm
- c) per urnas
  - liung 70 cm
  - lad 60 cm
  - profund 80 cm

### Art. 15

Mintga vischi e mintga urna ei da satrar en ina fossa separada.

Satrar

Sin giavisch dil defunct ni dils parents astgan els satrar urnas en ina fossa existenta ni satrar pliras urnas en la medema fossa tenor lubientscha.

Denton vala il temps da ruaus dall'emprema satrada; quei vul dir che quel vegn buca prolunghius.

### Art. 16

Il temps da ruaus per tuttas fossas ei 20 onns.

Ruau da fossa

Tier fossas che vegnan dismissas suenter il temps da ruaus ein eventuala ossa ed urnas da satrar sco ei descha.

**Art. 17**

Igl ei scumandau d'exhumar ina bara avon ch'il temps da ruaus da fossa seigi spiraus. Per excepziuns ei il departament giusta, polizia e sanidad cumpetents.

Exhumar

**Art. 18**

Aschilunsch che la suprastonza communal ordeina da dismetter ina part dil santeri sunter il temps da ruaus da 20 onns sto ella annunziar quei publicamein silmeins 6 meins avon il termin da rumida ed era orientar ils vegnentsunter.

Dismetter las fossas

**Art. 19**

Succeda la rumida buca enteifer il termin fixau, capeta ella per incarica dalla suprastonza communal cun adossar ils cuosts als parents da tiarzas persunas.

Rumir la fossa

Sur da monuments e cruschs-fossa che vegnan buca allontanai dispona la suprastonza communal.

**Art. 20**

Per satrar eis ei da far diever da vischals d'ina sort da lenn stgein (lom) e d'urnas che sedissolvan.

Qualitad dils vischals e dallas urnas

Ei la bara ultra dil vischi da lenn aunc enzugliada en ina folia da plastic ni tschinclada da metal eis ei da procurar en moda cunvegna che aria sufficienta hagi access tier la bara.

**Art. 21**

Scadina fossa duei vegnir marcada cun ina crusch-fossa ni in monument da fier. Monuments da crap vegnan buca lubi. Egl ault astgan las cruschs-fossa ni ils monuments buca vargar ils 140 cm sur la rama, el lad buca ils 70 cm.

Fossas

Plinavon eis ei d'ornar mintga fossa cun ina rama da crap. La rama sto survargar il terren per 10 cm. Ella astga esser mo da crap natural verd.

Il crap-fossa sto esser denter 10-20 cm pli aults che la rama. La ladezia dil crap-fossa (sur la rama) astga esser denter 30-40 cm. Sco material astga vegnir duvrau mo crap natural. Crappa pulida ed era inscripziuns sil crap ein buca lubidas.

Scadin crap-fossa e monument sto esser formaus artisticamein cun gust en tuts graus e s'accordar harmonicamein cugl entir santeri. Fossas cunfinontas duessen s'accordar.

La rama ed il crap-fossa vegnan organisai e mess a disposiziun dalla vischnaunca politica per il temps da ruaus. Vegn in auter crap-fossa giavischaus,

sto el corrispunder allas mesiras tenor reglament e sin agen cuost.

#### **Art. 22**

Tgi ch'ei en possess da fossas e monuments da fossas ei obligaus da mantener quei en bien stan. Sch'enzatgi fa buca siu duer da mantener quels, ordeina la suprastonza communal da metter en uorden quels cun adossar ils cuosts als pertuccai.

Manteniment

Igl ei scumandau da plantar plontinas e caglias sin las fossas aschilunsch ch'ei ha consequenzas mulestusas per il contuorn.

Igl ei il duer dalla vischnaunca da mantener igl ulteriur spazi dil santeri.

#### **Art. 23**

Mintgin ha il dretg d'entrar en santeri.

Schurmetg dil santeri

Igl ei en special scumandau da

- far canera e sedepurtar en moda disturbonta sigl areal dil santeri;
- far donn e tschuffernar las fossas sco era igl ulteriur areal dil santeri;
- prender giu ed allontanar fluras e plontinas senza esser autorisau;
- prender tgauns en santeri.

#### **Art. 24**

Monuments e cruschs-fossa da valeta artistica ni historica, ni tals che valan per atgnadads specialas dil santeri meretan da vegnir protegi particularmein dalla vischnaunca. Els astgan buca vegnir allontanai ni midai senza conclus dalla suprastonza communal.

Manteniment da cruschs e da craps-fossa

#### **Art. 25**

Craps-fossa sco era la rama dalla fossa astgan vegni tschentai pér 12 meins suenter la sepultura. Il terren astga esser ni bletschs ni schelaus. Tenor lur grondezia ston els vegnir fundai bein ed en uorden.

Temps per ramas, cuschas e monuments

### **IV. Determinaziuns finalas e penalas**

#### **Art. 26**

Cuntravenziuns a quei uorden vegnan puniadas conform allas cumpetenzas dalla surpastonza communal.

Determinaziuns penalas

Igl ei resalvau d'exequir l'ordinaziun sin donn e cuost dil culpont sco era da remetter quel al derschader penal.

La procedura sedrezza tenor las prescripziuns cantunalas dalla procedura penala avon las autoritads administrativas.

**Art. 27**

Quei uorden remplazza quel dils 29 d'october 1993. Cu el entra en vigur vegnan tuts ils conclus da vischnaunca ch'ein cuntradictoris a quei uorden abrogai.

Abrogar las  
determinaziuns  
cuntradictorias

**Art. 28**

Quei uorden entra en vigur cun l'approbaziun dalla radunonza communal e vala naven dall'emprema sepultura el santeri vegl.

Vigur

Approbau dalla radunonza communal dils 16 da december 2005.

Il president communal:

*Vitus Dermont*

Il scarvon communal:

*Rest Giacun Coray*

**Uorden da taxas pigl  
uorden da sepultura e santeri  
dalla vischnaunca da Laax**

	Defuncts cul davos domicil en vischnaunca	Defuncts cun domicil ordeifer
a) fossa en retscha	frs. 700.--	frs. 1'800.--
b) fossa per urna	frs. 500.--	frs. 1'600.--
c) exhumaziun	tenor cuosts	tenor cuosts

En las taxas tenor lit. a), b), c) ein las suandontas prestaziuns cuntenidas:

- tucclar da bara;
- cavar e curclar la fossa;
- metter la bara en carner;
- organisar e tschentar la rama ed il crap-fossa;
- empristar la rama ed il crap-fossa per il temps da ruaus.